

G s u n d e r H u m o r

Es haout grad fümfer gschlong ghat, und in Herbst wirds daou scha ziemlich duschper, kinnt die Maich von Hosnföitern vira, die Hähna sen scha bal a Stündl am Stangla gsessn, kinnts vira und siaht newan Gartntürle was Schwarz hinter da Stauan hockn. Ja, Teifl, denkt sie, was is denn daou in mein Gartn arin? Dös röihert si ja! Sie nimmt vorsichtshalber a Brathaua, waou zoufölli oan Hauseck loihnt, und gäiht langsam viri.

"Jessas naa! Wos toust denn du daou?" bäigt sie, wöis gnaucht sot droa war und leßt ihr Haua falln.

"Pscht, staad! Plär niat sua!" sagt da Deas und grinst. "Die Arwet is aas; glei kinnt da Michl!"

"Na, und?"

"Ich...ich..." Da Deas koa si kaam haltn vo Lachn. "Ich ho an Göldbeitl oanaran Fo(d)n oibundn und honan aaf d'Straouß glegt...Und wenna si...wenna si danaou buckt, da Michl... zöih ihn w...weg!"

"Und dös söll a Witz saa?" fräigt die Maich ziemlich bäis.

"Humor is dös! Gsunder Humor! Haousta niat glesn?"

"Wos?"

"Typisch Weibsbild! Stundnlang mit da Illustriertn imma-hockn, an Peter Alexander oaschaua und as Kreizworträtsl falsch läisn, ower nix lesn! Da Dokter Dings haout in... in Dings..in Ärztlichn Ratgeber haout der gschriem, daaß nix Gsünders git, wöi an Humor!"

"Sua! Und deanthalm legst du an Göldbeitl daou aassi?"

"Fraali!" Da Deas fängt wieder as Lachn oa, as staaßtan nea grad asua. "Woißt, wenn da Michl...danebm...danebm.. langt..." Er koa wirkli nimmer.

"Suara kinnisch Mannsbild! - Daou koast du nu am Taounbett drüwer lachn, wo?"

"Kinnt draaf oa!"

"Aaf wos?"

"Nu, da oi stirbt si ganz leicht, und da anner gäiht bal draaf dabaa! - Öitza hock di her daou zo mir, daaßt aa amal wos zon Lachn haoust! Glei mou er kumma, da Michl."

"Ich spinn doch niat!" sagt die Maich bal aweng zorni,
nimmt ihr Haa und gäiht hinti ins Haus. ---

"Du, Maich! - Horch holt amal her!"

Die Maich draht si aaf ihrn Stöll im. "Ha, wos is?"
Unter da Stuntür stäiht da Deas und is aweng verleng.

"Kannst du...kannst du niat amal zon Michl üwigäih?"

"Ich? Zon Michl? Wos sölli denn daou?"

"Ja...woißt...der...der war schneller wöi ich..."

"Wer?"

"Da Michl. Rapsch, haoutan scha ghat. Und der war aa niat
stark gnouch."

"Da Michl?"

"Naa, da Fo(d)n ! Zack, haoutan ogrissn ghat!"

"Dös gföllt ma, daaß dich aa amal wer droabracht haout."

"Ich schenier mi ja asua! Gäih üwi und hulnan!"

"Ha, ich wia wecha dean altn Göldbeitl zon Michl üwigäih!"

"Wos hoißt daou olt?"

"Du...du haoust doch niat ewa dein neia Göldbeitl aassi-
glegt, waouada zon Geburtstoch gschenkt ho?"

"Naouaran altn häita si am End niat buckt!"

"Daou häjert si scha alles aaf! Öitza brauchst blaouß nu
song, daaß aa wos drinna war!"

"A vuller Göldbeitl schaut viel nadierlicher aas."

"Moa! Moa! Am löibstn tiatada....Wöiviel?"

"Wos?"

"Wöiviel Göld daaß drinna war?"

"Ach, sua! - Acht...."

"Wos? Acht Mark?"

"Naa....achta...achtadachtzich..."

"Naarrisch kannst wern! Achtadachtzich Mark legt der Hamml
aaf d'Straouß aassi! Waouher woißtn dös sua genau?"

"Waal an Hunnerta ei ho!"

"An Hunnerta....und?"

"Und...und naou howi vierzeah Mark an Böiermoa zohlt davo!"

"Vierzeah! Rechna koast aa niat! Naou sen doch blaouß nu
sechsadachtzich drin."

"Naa, achtadachtzich!"

"Wöisua?"

"Dös haoust ewa du nu niat dalebt, wo, daaß si oiner ver-
ziahlt haout üwern Wiedergebm? - Gäih zou, gäih üwi zon
Michl!"

"Wos sölli denn song, Kerl?"

"Sagst...sagst, daaßi...mein Göldbeitl verlorn ho!"

"Dein Göldbeitl verlorn, sochi, und nu wos!"

"Ja, wos denn nu?"

"Dein Verstand!"

"Daou bist doch du droa schuld!"

"Wer? Ich? Öitza wirds recht! Warum denn?"

"Waalstas du kaaft haoust, döi Scheißillustrierta!"

Otto Schemm